



Publicaziuns dalla vischnaunca, jamna 46

Votaziuns federalas e communalas dils 28 da november 2021

L'urna principala en casa communalà ei aviarta sco suonda:

Dumengia, ils 28-11-2021 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediat, denton **sil pli tard entochen venderdis, ils 26 da november 2021, allas 17.00**, tier l'administraziun communalà (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grischà e **serrar giu** ella.
2. Metter la cuviarta da votar grischà ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communalà saveis Vus tarmetter cun posta (supplicau da francar) ni directamein fierer en la scaffa da brevs dalla casa communalà. Ils cedels da votar ston esser sil pli tard la dumengia, ils 28 da november 2021, allas 11.00 tier l'administraziun communalà.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communalà

Damondas da baghegiar

2021-1082.000

Datum dalla publicaziun: 19 da november 2021

Il patrun: STWEG Parz. 1252, Via Acletta 59, 7180 Disentis/Mustér

Il representant: Felix Monn, Via Sontga Catrina 3, 7180 Disentis/Mustér

Object: Sanaziun dil mir existent e construcziun nova da dus mirs, parcella 1252, Via Acletta 59, 7180 Disentis/Mustér

2021-1083.000

Datum dalla publicaziun: 19 da november 2021

Il patrun: STWEG Parz. 531, Via Alpsu 26, 7180 Disentis/Mustér Il representant: Casatec SA, Via dalla Stampa 8, 7180 Disentis/Mustér

Object: Remplazzament dil scaldament entras ina nova pompa da calira d'aria, parcella 531, Via Alpsu 26, 7180 Disentis/Mustér

Protestas:

Ils plans da construcziun ein deponi tier l'administraziun communalà. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 19 da november 2021

Uffeci da baghegiar Disentis/Mustér



Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2021-1058.000

Ladina Bearth e Dominik Venzin, Via Sontget 11, 7180 Disentis/Mustér; construcziun nova d'ina casa d'ina famiglia ed in carport, parcella 3985, Via Cafeni 2, 7180 Disentis/Mustér.

Nr. 2021-1059.000

Gionina Spescha e Silvio Candinas, Via Dulezi 12, 7180 Disentis/Mustér; spazzada digl edifices nr. 190A e construcziun nova d'ina casa da pliras familias, parcella 628, Via Dulezi 12, 7180 Disentis/Mustér.
Disentis/Mustér, ils 19 da november 2021

Uffeci da baghegiar Disentis/Mustér

Annunzias da baghegiar

All'istanza da baghegiar ein sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandonts projects:

Nr. 2021-2099.000

Ignazi Furger-Camathias, Via da Scola 4, 7180 Disentis/Mustér; sanaziun dil tetg-casa, parcella 701, Via da Scola 4, 7180 Disentis/Mustér.

Nr. 2021-2101.000

Vischnaunca Disentis/Mustér, Via Cons 2, 7180 Disentis/Mustér; installaziun d'in tumbin per tschaffada d'aua neiv artificiala, parcella 1878, Plaun Sut, Disla, 7180 Disentis/Mustér.

Disentis/Mustér, ils 19-11-2021

Uffeci da baghegiar Disentis/Mustér

Cussegl da vischnaunca

Il cussegl da vischnaunca seraduna **venderdis, ils 19 da november 2021**, allas 20.15 en halla Cons.

Tractandas:

1. Protocol 7-2021/2024
2. Preventiv 2022 (messadi nr. 14-2021/2024)
3. Ura da damondas (conform ad art. 44 dil regulativ da fatschentas)

Il president dil cussegl da vischnaunca

Seivs mobilas per la pasculaziun

Tenor art. 75, al. 1 dalla lescha da baghegiar ed art. 18 al. 1 dalla lescha d'agricultura ston tuttas seivs mobilas vegnir allontanadas **sil pli tard treis dis** suenter la pasculaziun. Quei vala era per seivs da gatter. Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren.

Nus supplichein da prender enconuschientscha da quei fatg e d'instradar las mesiras prescettas.

Disentis/Mustér, november 2021

Uffeci da baghegiar ed infrastruttura



Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la **fin da november 2021**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Disentis/Mustér, november 2021

Uffeci da baghegiar ed infrastruttura

S. Clau Funs–Latis–Clavaniev

Ils 4-12-2021

Muort la situaziun da Corona vegn il di da S. Clau menaus atras auter che usitau. Il S. Clau e sia suite san deplorablamein far neginas visetas ellas casadas. Uonn sa l'uniun da giuventetgna mo dar la pusseivladad allas famiglias cun affons, da visitar il S. Clau el curtin dalla villa. Las visetas han liug naven dallas 16.00 entochen allas 18.30. Las famiglias vegnan supplicadas da s'annunziar entochen ils **28-11-2021**.

Annunzias: ricardoflepp@gmail.com

Tonaton selegrein nus sin ina biala ed emperneivla sera da S. Clau e giavischein a tuts in bi temps d'advent.

UG Funs, Latis, Clavaniev

Seniora-Ca envida ell'Aua Viva

Gievgia, ils 25 da november 2021, allas 12.00 alla sentupada tradiziunala dils seniors/dallas senioras dalla vischnaunca da Mustér tier in bien gentar e star da buna cumpignia – participaziun mo cun certificat Covid-19! Annunziar tochen **mardis, ils 23 da november 2021** allas 9.00 a Puntreis sut 081 929 56 56. Sch'enzatgi drova transport era gest indicar tier l'annunzia.

Per ulteriuras informaziuns saveis s'annunziar tier Linus Maissen, 079 423 01 37.

Bien engraziament.

Post d'informaziun Seniora-Ca



Uniun da dunnas Disentis/Mustér

Sentupada cun affons pigns e geniturs

La grupp da seruschnar/termagliar dat la caschun als affons pigns ed als geniturs da s'entupar, paterlar e termagliar. Tut ils affons entochen treis onns (cun fargliuns e geniturs) ein cordialmein beinvegni allas sentupadas meinsilas. Las sentupadas duessen plinavon era far queidas als affons da visitar pli tard la grupp da termagliar Artgin che ha liug el medem local e nua ch'ils affons stattan persuls duas uras cun las menadras, e quei inaga la jamna. Pils affons eis ei sco d'entrar ella tiara dalla cucagna cun massa novs termagls e tut quei da cumpignia.

Vegni e mirei, nus selegrein sin Vossa viseta!

Proxima sentupada: **gievgia, ils 25 da november 2021.**

Temps: 15.00–16.30. Liug: Casa da scola Segnas, local Artgin, 1. alzada. Prender cun: marena e scalfins.

Ulteriuras informaziuns e datums anfleis Vus sut <https://www.uddm.ch>

Cordialmein envida Uniun da dunnas, ressort affons

Sentupada cun Sontgaclau

La grupp dil ressort affons envida tut ils affons entochen quater onns ensemen cun lur mummas ni era babs e fargliuns ad ina sentupada comunabla cun il Sontgaclau giu Madernal/Pardomat. Suentar la viseta dat ei aunc in sitg cauld.

Datum: **Gievgia, ils 2 da december 2021**

Sentupada: allas 14.00 a Madernal/Pardomat

Cuosts: La occurrenza cuosta.

Annunzias: entochen ils 30 da november tier Sarah Huonder, 079 265 42 69 ni
Sonja Muscas, 079 681 58 66

Uniun da dunnas, ressort affons

Wollsammlung Swisswool

Freitag, 26.11.2021

Baubarit, Segnas

Zeit: 10.00–14.00 Uhr



Preavis Seniora-Ca

Gievgia, ils 25 da november 2021, allas 12.00

Seniora-Ca envida ils seniors/las senioras dall'entira vischnaunca da Disentis/Mustér tier la tradiziunala sentupada ell'Aua Viva cun gentar (mo cun certificat).

Per l'annunzia mira «Fegl official» dils 19-11-2021.

Post d'informaziun Seniora-Ca
